



Assartuussineq pillugu Isumalioqatigiissitaliamut Naalakkersuisunullu allakkat ammasut

Assartuussineq pillugu Isumalioqatigiissitap aningaasartuutit kaasarfimmiit kaasarfimmumut nuukkusuppai

Assartuussinermut Isumalioqatigiissitaliap inassuteqaataanut Borgmester Jess Svane (S) isumaqataanngilaq. Qaasuitsup Kommuniani ineriartornikkut periarfissaasinnaasut Naalakkersuit isiginiarnerusariaqarpaat Nuummi Atlantikoq ikaarlugu mittarfissaq akisoqisoq taamaatillugu.

Qaasuitsup Kommuniata Naalakkersuisut kajumissaarpai Assartuussineq pillugu Isumalioqatigiissitap innersuussutaaniit atitunerusumik eqqarsaasersoqqullugit.

Isumalioqatigiissitap inassuteqaatai arlaqaalupput kommunemi innuttaasunut 18.000-nggajannut eqquisussat, innuttaasullu sinnerlugit inassutigisani ajornartorsiutit tikkuartussavakka.

Qaanaami Mittarfeqarfiup matunissaa

Qaanaami mittarfiup nutaangajaap matunissaa uungaannaq isigineruvoq. Aammattaaq pissutsinut Qaasuitsup Kommuniani innuttaasut avannarlarsaanniittunut annertuumik ajorseriaataasussaavoq.

Pituffik amerikkamiut sakkutooqarfigaat qulakkeerneqarsimanngilarlu taamaattuaannarnissaa. Assersuutitut taasinnaavarput Islandimi Keflavik, amerikkamiut qimassimavaat. Naalakkersuisuniit kissaatigineqassappat innuttaasut nikeriarsinnaanerata qanoq inissisimanissaa amerikkamiut nunanut allanut politikkeqarnerannit aalajangerneqassasoq tamanna uungaannaq isiginerussaaq.

Mittarfik kiisalu umiarsualiveqarnermut pissutsit pitsaanerusut ukiuni qanittuni Qaanaami pisarialerujus-suanngorsinnaapput. Baffinip Kangerliumarngani uuliaqarsinnaanera ilimanaateqarluarpoq, tamanilu uuliaqarneranik misissuisoqalerpat Qaanaami mittarfeqarnissaa isumatusaarnerussaaq. Taamatuttaaq silaannaap allanngornerata kingunerisaanik imartami annertusiartuinnartumik angallanneq kingunerissavaa, tassanilu mittarfeqarfik periarfissiissaaq inuttanik, pilersuinernik takonarissanillu taavunga avammullu timmisartuussisarnissaannut.

Qaanaami innuttaasut inissisimanerat ajornerulissaaq mittarfik matuneqarpat. Qulimiguullit timmisartuningarnit naatsorsuutigiuminaannerupput, siusinnerusukkullu Qaanaaliartut allaat sapaatip akunnera Pituffimmi silarlutsillugu ikkarlissimasarsimapput. Tamanna inuiaqatigiinnut niivernerlunneruvoq.

Ilulissani takonarissanut mittarfik

Ilulissat tassaavoq Kalaallit Nunaanni takornariaqarfiit sallerfaat. Takornariaqarneq avataaniit aningaasarsiornermut annertuumik isertitaqarfiuvoq. Taamaattumik mittarfeqarfiup 1199 meteriinnarnik tallineqarnissaanik assartuineq pillugu Isumalioqatigiissitaliap inassuteqaataanut Qaasuitsup Kommunia akerliulluinnarpoq.

Assartuineq pillugu Isumalioqatigiissitap inassuteqaataa naammattumik tunngavilersugaanngitsoq isumaqarpugut. Isumalioqatigiissitaliap inassutigaa Nuummi allaffeqarfissuarmi akisoorsuarmik Imarpik qulaallugu mittarfiliortoqassasoq. Mittarfik, silaannaap tamaani pissusai pissutigalugit sananeqarsinnaangunngitsoq.



Kikkulliuku Nuummiit Nuummullu bilitsinik akiliisartut? Tassaapput Namminersorlutik Oqartussat atorfilittai taakkumi pisisartuni annersaapput. Tassa kaasarfimmiit kaasarfimmut aningaasanik nussuineq. Taarsiullugu Naalakkersuisut angalanermut aningaasartuutit annikillisartariaqarpaat. Nuummi imaatigut kabelilersuinerup ammaannikuuvaa video atorlugu ataatsimiissinnaanerit, taamaasiornikkut Danmarkimut angalanerpassuit pisariaarutsissinnaangaluarpaat.

Taarsiullugu Ilulissani takornarissanut mittarfimmut 1799 meteriusumut aningaasalersuisoqartariaqarpoq takornarissanik sulii amerlanernik pilerinarsaasoqarluni. Taamaasiornikkut takornarissat nunatsinniik nunatsinnullu angalaneeq akilersueqataaffigisinnaavaat.

Ilulissani takornarissanut mittarfiliornikkut aamma pitsaasumik nunatta avannaani ineriartortitsineq qulakkeerinneqataaffigisinnaassangaluarpaat.

Aalisarneq tassaavoq inuuniuterput

Assartuineq pillugu Isumalioqatigiissitap inassuteqaatai aningaasarsiornikkut tunngaviulluinnartumut paasinnissimanginnermik ersersitsivoq. Aalisarneq sulii inuussutissarsiutit pingaarnersaraat. Inuiaqatigiit aalisarnikkut aningaasalersorneqarput.

Aalisarneq Qeqertarsuup Tunuaniik avannamut Upernavimmi Uummannamilu ingerlanneqarpoq. Tassa inuiaqatigiit tamakkerlugit eqqarsaatigissagutsigit, taava pingaarteqaqaq Ilulissani, Upernavimmi Uummannamilu umiarsualiveqarfiit inerisarneqarnissaat.

Taamatuttaaq puigorneqassanngilaq Qeqertarsuaq, tassanimi imermik tunisassiorneq isumalluarnartumik ineriartortinneqarpoq.

Nassiussat tamakkerlugit Nuummumt nassiuttarnissaat tassanngaanniillu ingerlateqqittarnissaat Assartuineq pillugu Isumalioqatigiissitap anguniagassiissutigippagu allaanngilaq inuiaqatigiit ineriartortinneqarnissaannut paasinnittoqarsimanngitsoq.

Qaasuitsup Kommuniiani isumaqanngilagut suna tamarmi Nuummi ingerlanneqassasoq. Taamatut ingerlaannartoqarsinnaanngilaq.

Assartuineq pillugu Isumalioqatigiissitap qutsavigerusuppara suliarujussuarmut, tassani immikkoortunut qitiusunut isumaqataanngilagut. Ilanngullugu uparuartariaqarpara ajuusaarnartuummat, isumalioqatigiissitap nalunaarusiaata kalaallisoortaa saqqummersitsineri piareersimasimanngimmat.

Inussiarnersumik inuulluaqqusillunga

Jess Svane (S)

Borgmester

Qaasuitsup Kommunia